



Tir Yimiyim

www.tirymiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymiyim@gmail.com

TAPAK 8

Yangia anidakangma :

f Tir Yimiyim

Instagram tirymiyim@aolima

YouTube tir yimiyim

TAPAK 3

Canada election: Trudeau-maneni yimsü asütsü

Sonowal-i Rajya Sabha by-election atema tenüng agütsü

VOL. XVIII NO. 340 (ADOK 340) DIMAPUR RASEMNÜ (WEDNESDAY) RONGJUI (SEPTEMBER) 22, 2021 ₹ 5.00

COVID-19 Nagaland: 52 dak putet, 43 taneptsü angu & 3 asü

Kohima, September 21, 2021 (TYO): Mongulbarnü Nagaland nung nisung 52 dak COVID-19 aliba putet, nisung 43 taneptsü angu aser 3 asü.

"Tesiüba ghonda 24 tsüingda nisung 52 dak COVID-19 putet. Parnokji Kohima nung 27, Dimapur nung 19, Mokochung nung 4 aser Phek nung 2 lir" ta Integrated Disease Surveillance Project atema State Nodal Officer, Dr Ritu Thurr-ia ashi.

"Kasa mapang COVID-19 puteta alir nisung 43 taneptsü angu. Parnokji Dimapur nung 33, Kohima nung 5, Mokochung nung 4 aser Wokha nung 1 lir" ta paisa ashi.

Nisung 30,957 nungi 28,878 taneptsü nguogo aser ibaji 93.27% lir, ta paisa ashi.

"Tang COVID-19 puteta alir nisung 470 anepaludar saka parnok rongnung nisung 368 dakbo shirangba yimya kecha mali" ta Dr Kikon-isa metetdaksü.

Nagaland sorkari Vitamin Angels den külemi tanurtem yaritsü

Kohima, September 21, 2021 (TYO): Nagaland nung tanurtem achiajem manguba aser arishi küm 5 ser teküpok tanurtem asüba tebilemstütem koktetsü atema state sorkari telok ka den sendaktepogo.

"State sorkari Vitamin Angels ta ser international not-for-profit organization den tesentaktep yangluogo" ta Department of Health and Family Welfare, National Health Mission (NHM) mission director, I Talitemsula Jamir-i ashi.

Iba tesentaktep ajanga tanur

Yaküm Nagaland nung gari lendong balala nung nisung 33 asü

Kohima, September 21, 2021 (TYO): 2020 küm Nagaland nung gari lendong balala nung nisung 33 asü, ta National Crime Records Bureau (NCRB)-i metetdaksüogo.

NCRB-i 2020 atema 'Crime India' report agütsüba nung iba osang ya lir.

"2020 küm India nung gari lendong lakh 1.2 atalokba züluoka lir. Lendong balala nung nisung 1,33,715 asü. 2019 nunga

CM Sarma-i RSS dang Assam nung Hindu nung kümzüksü ayongzük

Silchar, September 21, 2021 (Agencies): Assam ya Kashmir ama akümtsü ana nung lir ta Assam chief minister Himanta Biswa Sarma-i ashi.

Sichar nung Rashtriya Swayamsevak Sangh (RSS) züngsemtem den jembidang CM Sarma-i "Assam ya Kashmir ama akümtsü" ta ashi.

Paisa RSS dang nisung telok ka nungi Hindu nung kümzük ayutsü ayongzük.

"Item nisungtemi tashiyim amshiba ajanga Satra tem

"Mongulbarnü Covid-19 puteta alir nisung 3 asü. Parnokji Dimapur nung 2 aser Kohima nung ka liasü. Tanü asürtem züngsema nisung ajak agi 657 kümogo saka parnok nisung 15 dak tanga tashidak liasü" ta paisa ashi.

"Hombor tashi nung nisung 678,570 nem COVID-19 vaccine indang dose 984,424 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,915, healthcare workers 15,994, arishi küm 45 ser temapur 196,458 aser arishi küm 18 nungi 44 tsüingda alir 405,203 lir" ta pai ashi.

"Vaccine agirtem rongnungi nisung 305,854-i dose anaprong agiogo. Parnokji frontline workers 46,926, healthcare workers 13,202, arishi küm 45 ser temapur 128,624 aser arishi küm 18 nungi 44 tsüingda alir 117,102 lir" ta Dr Thurr-isa metetdaksü.

nem vitamin, multiple micronutrient supplements (MMS) aser deworming tablets agütsüba maparen ulushitsü ta lai ashi.

"Iba ajanga health & nutrition nung frontline workers yaritsü, Maternal, Infant and Young Child Nutrition Programme (MIYCN) akangshitsü aser mashisa aliba tetsür nem MMS agütsütsü" ta Talitemsula-isa metetdaksü.

NHM aser Vitamin Angels tsüingda taküm küm tetenzüklen MoU ka nung sign sütep.

gari lendong nung nisung lakh 1.36 aser 2018 nung lakh 1.35 asü" ta National Crime Records Bureau (NCRB)-i ashi.

NCRB-i State balala indang osang agütsüba nung yaküm Nagaland nung gari lendong 30 atalokba nung nisung 33 asüba shia lir.

Lendongtem rongnung 'Hit and Run' 16 atalokba nung nisung 16 tsükset aser tanga lendong 14 nung nisung 17 asü.

lendong nung lir. Kasa mapang süngolu ayimdak aser meta talang pilar aliba tesemtem nung aliba Hindu nung samaa aotsü tia ka nung lir" ta Assam chief minister-isa metetdaksü.

Assam nung nisung kari maneni CAA anema noktaker ta chief minister Sarma-isa ashi.

"Tawa tu shisashir mongin kari kü den ajuruteper aser parnokji kü dang Bengali Hindu nung ya Assamese nung atema lendong masü ta shiogo. Assam nungeri tang ibaji angateter" ta paisa ashi.

Assam CM Sarma-i Th. Muivah den ajuruteper

Guwahati, September 21, 2021 (Agencies): Union Home Minister Amit Shah-i nungloksüba ama Assam Chief Minister Himanta Biswa Sarma-i tanü Dimapur nung NSCN (I-M) general secretary Thuingaleng Muivah den ajuruteperogo.

Iba senden nung Nagaland Chief Minister Neiphiu Rio aden.

New Delhi nung Amit Shah den ajuruteperba sülen ghonda 24 majungdang Assam Chief Minister Sarma-i tanü Nagaland Chief Minister Rio den ajuruteper.

Tanü anüingdang 12:30 ako meta Sarma Dimapur tonga aru aser idak nung jaji pai indangindanga Rio'er kidangi ao. Iba sülen tena külemi Thuingaleng Muivah den ajuruteperi ao.

Senden amenba sülen Dr. Sarma-i resort kati ao aser Intelligence Bureau special director A.K. Mishra aser State

BJP lennirtem den ajuruteper sensaksem.

Deputy Chief Minister Y. Patton, state party president Temjen Imna Along Longkumer aser Minister temi Dr. Sarma den ajuruteper.

Dimapur-i maodang Assam CM Dr. Sarma-i Guwahati nung osangbener den jembidang "iba ya yimten nungdak atema semdangba lir" ta ashi.

"Ni Nagaland, Manipur, Tripura aser Mizoram-i mapang shia aoer. Iba ya tang tasen masü. Ni yimten nungdak atema aoer" ta Sarma-isa ashi.

Taoba mapanga Delhi nung NSCN (I-M) lennirtem den asemben-pezüben ka ajuruteperogo, ta paisa shisem.

ASSAM CONGRESS-I ARENTAKER:

Assam CM Dr. Sarma-i Naga yimten tebilemstü nung shilem agiba atema arentaka bilemer, ta

Assam Pradesh Congress Committee (APCC)-i metetdaksüogo.

"Sarma-i shilem agiba ajanga Assam ali nung kongshitsü akok kechiyong NSCN (I-M)-i 'Greater Nagalim' meshir. Iba ya Northeast nung Naga nung aliba tesem ajak ketdangsubaren ka kübok dendaksütsü atema lir" ta APCC President Bhupen Kumar Borah-isa ashi.

"Assam Chief Minister den külemi Manipur Chief Minister N. Biren Singh danga Naga yimten olemtep nung adentsü shiogo. Ajisüaka, Manipur Chief Minister-i Greater Nagalim onük atema madentsü lemtetba onoki osang angazükogo" ta Borah-isa metetdaksü.

"Assam State Assembly aser Cabinet den masüingdangtepi Dr. Sarma-i Muivah den kechi jembiar onoki metetnür" ta paisa ashi.

Dimapur nung anogo ananü atema 'Vanijya Utsav' amonger

Dimapur, September 21, 2021 (TYO): Urban Haat Dimapur nung tanü nungi anogo ananü atema 'Vanijya Utsav' sentong tenzükogo.

Iba sentong ya Department of Industries and Commerce-i Agricultural and Export products Development Authority of India (APEDA) aser Directorate General of Foreign Trade (DGFT) den yaritepa ayongzük.

Nagaland nungi local & agri-Horti, chiyungstütem, handloom & handicrafts aser tanga product tem tangaleni yoktsü atema iba sentong ayonga amonger.

"Ibala sentong ayonga agiba nung tajanzük alitsüla. Sorkari inyakba maparen nung nisungtemi shilem agitsüla. Department of Industry and Commerce-i teyaritsü tim yaria mapa inyaker anungji nisungtemia bendanga agüja

inyaksangshitsüla" ta Industries & Commerce, Labour and Employment, Skill Development and Entrepreneurship Advisor, Imnatiba Jamir-i tanü ashi.

"Department-i Ganesh Nagar nung world class export centerka yanglua lir saka Nagaland investor ka danga mali. Nagaland-i tetsükdaksü ajurubatem rongnung Indo-Naga yimten tebilemstü dena lir" ta paisa ashi.

"District shia nung Business Association temi pei pei Deputy Commissioner tem den tesentaktep yur inyaksangshitsüla. Industries department-i iba sentong takok ngua ayongzükba atema tenüngsang agütsür aser APEDA aser Centre sorkar ketdangsurtemi yariteperba atema pelar" ta Advisor Imnatiba-isa ashi.

India nung Special Economic

Zone aliba state ji Nagaland dang lir anungji asenoki tangaleni bener yoktsüba ajungmesotsüla. Iba exhibition sentong ya tatembang masü saka department-i tanga maparen inyaka aotsü lenmangtem anguba sentong ka südakjang" ta Commissioner & Secretary, Industries and Commerce, Kekhrievor Kevichusa-isa ashi.

"2021- 22 nung 400 billion dollars export alizüng yua aliba nung state ajaki shilem agitsü ayongzük" ta Economic Advisor, Department of Commerce, GOI, C. Vanlalramsanga-isa ashi.

"Nagaland dena North East State temi wadang balala nung tangaleni bener yoktsüba tashi lir. Anungji state ajaki akokba tashi iba alizüng yur mapa inyaksü ayongzük" ta Vanlalramsanga-isa metetdaksü.

NSCN/GPRN-i Mughavi Zhimo den meinyaksü metetdaksür

Dimapur, September 21, 2021 (TYO): NSCN (Khongo) Tatar aser Nagaland Transport Association vice president Mughavi Zhimo-i pa ajanzüksü atema NSCN/GPRN dena telungpur telok aika tenüng nung sen sarur. Anungji transporters/transport agencies ajaki pa den meinyaksü metetdaksür ta NSCN/GPRN-i ashi.

Pai tiyongtsü nung inyaker ka ama transporters nungi sen crore aika sarutet saka ibaji tagütsütsüpur nem magütsü. Pai Dimapur nung ali aika aliogo aser Zunheboto district nung pa tenüng nung yim ka amenoktsü

atema Rs. 8 Crores agi ali aliogo. Iba dakji alia pai Thilixu yim nung chubar ki ama yangluogo, ta MIP, NSCN/GPRN-i sangdong ka nung metetdaksü.

Mughavi Zhimo-i NSCN/GPRN tenüng nung sen sarutsü atema kodang temelaba magütsü. Talisa pa ya NSCN (Khongo) züngsem ka lir anungji NSCN/GPRN-i pa nem temelaba agütsü ta asütsü madoker, ta parnokisa ashi.

Pai transporters dang nungi 'protection money' ta ser ita shia sen meshir aser iba dak alia NNPG tenüng nung sen sarur. Pai linük tenzükertem tenüng

amer sen tim mesüi amshiba putetba sülen back dated appointment order ka bener 2020 nung NSCN (Khongo) nung aden, ta MIP, NSCN/GPRN-isa metetdaksü.

"Mughavi Zhimo amala nisungtem ajanga linük tenzükertem tenüng menüktsür anungji sensotemi item nisungtemi inyakba mapa meteta alitsüla. Onoki Mughavi Zhimo dang ozüng alema mapa inyakba anentsü ashir mesüra Azha nung aliba ama merenshitsü" ta MIP, NSCN/GPRN-isa sangdong nung metetdaksü.

Centre-i sen crore 20 jenjang aluyimer asendenshi sangdongogo



Union MoS-i Hombarnü osangbener den jempidang tangokba noksa nung angur.

Kohima, Rongjui/Sept. 21 (TYO): Tesem melenshia alu ayimba (jhum cultivation) tali asendenshitsu asoshi Central sorkari Nagaland nem sen crore 20 lemküksüogo, ta Union Minister of State for Forest, Consumer Affairs and Public Distribution, Ashwini Kumar Choubey-i Hombarnü metetdaksü.

Union MoS-i Nagaland yimtiba Hombarnü mezüngbuba semdangba mapang pai osangbener dang iba osang ya sangokja liasü.

Tekong lu ayimer takum liyonga aotsü atema temelen lenmang danga agütsütsü asoshi sen ya Compensatory Afforestation Fund Management and Planning Authority (CAMPA) kübok agütsütsü, ta pai ashi.

Tekong lu ayimba ajanga libajen nung kongshiba indang jembiba mapang pai süngtong-litong tema arem wazüka ayutsü aser state nung lipukum shidak ayutsü atema nungdak, ta pai ashi.

Iba project ya Eastern Nagaland nung district trok

aser Wokha district atema alitsü.

India tejakleni aotsü atema Ato Kilonser Narendra Modi-i Northeast region renloktsü nükjidong aliba indang lephsia ashiba jembiba mapang, iba region nung terenlok ya kanga nüshia lir saka Nagaland densema region renloktsü atema Modi-i mera ajak agir, ta pai ashi.

Iba yongji tali jangjashitsü atema Ato Kilonseri Union Minister ajunga nem iba region semdangdaksüner, ta Choubey-i ashi.

National Clean Air programme kübok Nagaland nung aliba Kohima aser Dimapur district densema temenentiba yimti 132 nem mopung tajungba kumdaksütsü atema nungdakba teyari agütsütsü, ta pai ashi.

Nagaland nungi yokba Nagar Vana Scheme 3 proposal ya Ministry ajanga asadangogo, ta pai metetdaksü.

Tanurtem dak libajen wazüka ayutsü molungsentsü lidaksütsü nükjidong nung CAMPA fund ajanga Centre-i

Nagaland nung aliba school 36 nem School Garden Nursery kaka amenoktsü atema senotsü teyari agütsütsü, ta Union Minister of State-i sangdonga liasü.

Nursery amenoktsü atema school shia nem sen 50,000 agütsütsü aser atsü anepalur atema sen 40,000 lemküja lir, ta pai metetdaksü.

Pradhan Mantri Garib Kalyan Anna Yojana noklem pezübuba nung Nagaland nem ita shia angati jang 7023 MT agütsütsü, koba agi state nung tang tashinung nisung lakh 10 ajangzükogo, ta pai ashi.

Arem aser libajen dak sendakba onüktem jembitsü asoshi Choubey-i Raj Bhavan nung Governor, Prof. Jagdish Mukhi ajurua liasü aser Chief Minister Neiphiu Rio-a ajurua liasü.

"State nung forest aser consumer affairs departmental project tem reprangshimtsü atema pa Nagaland nung lir. Pai Nagaland atema süoki ia bilemba aser yariba asoshi pa dang pelar," ta Rio-ia tweet ka nung shia liasü.

Dimapur Goods Transport Association khen mapa meinyaki atatsü

Dimapur, Rongjui/Sept. 21 (TYO): Dimapur Goods Transport Association indang Vice President, Mughavi Zhimomi dak tai tongloktsüba ken o nung ajemdaker CNCCI aser DCCI ajungben rongdak senden ka mena liasü, kechiaser telok ana ya interstate transport nung dena lir aser Dimapur nung amenoka lir.

Tentet tuluba ana yagi iba ken o jungjunga bushisügang masü tashi Dimapur Goods Transport Association mapa meinyaki atatsü, ta iba senden nung lemtet, ta CNCCI chairman, Dr. Khekugha Muru aser DCCI president, Akashe Zhimomi nati sangdong ja ajanga ashi.

Kasa mapang nijaren nung osettsüset belener dang nungdakba aser tongtipang osettem agi manüngdaksütsü mechi maneni osettsüset belenba maparen inyaka atatsü totuyuba agütsü.

Kasa mapang Hotel Saramati, Dimapur nung September 25, 2021 nikonngang 2:00 ako nungi tenzüka senden ka amentsü aser yangji Association nung aliba aser association nung maliba transporter ajunga arua adentsü metetdaksür, ta sangdong ajanga ashi.

DCCI aser CNCCI ajanga ayongba senden nung madenba transporter nem tapet temerenshi agütsütsü, ta sangdong nungsa shia liasü.

Aboi nung "Yes to Life" seminar ka ali

Dimapur, Rongjui/Sept. 21 (TYO): Aboi indang district Administration aser Aboi Town Baptist Church Youth department lungjemer September 19, 2021 nü ATBC Aboi nung Nasha Mukt Bharat Abhiyaan mesüra Drugs-Free India Campaign kübok "Yes to Life" onük nung ajemdaker seminar ka agia liasü.

Iba seminar nung Aboi Town nungi lanurtem dena liasü. Iba sentong nung C. Yongtok, ATBC Youth Director menden liasü aser district administration tenüng nung Dr. Cthitu Nienu EAC Longching ajanga o tatsüka jembia.

Iba sentong nung shisalen sayur, Dr. Ngampa Sangme, MD Physical Medicine and Rehabilitation, Medical Officer, District Hospital Mon ajanga temesepba mozü dak sendakba tebilemstü balala indang PowerPoint agütsü aser awareness agüja timtem nung alirtem yaritsü indang jembia liasü.

Pai sentong nung adener dang temesepba mozü nem mokokdaksütsü ajungshia liasü. Sentong tatemi lanurtemi temesepba mozü anema raratsü aser Aboi Town ya "Drug Free" kumdaksütsü atema züngzüktepa liasü

Jalukie Zangdi yimtsüng nung marketing shed ka saya



Dimapur, Rongjui/Sept. 21 (TYO): Peren district kübok Jalukie Zangdi yimtsüng nung XV Finance Commission (Basic) for the financial year 2020-21 kübok yangluba marketing shed ka September 21, 2021 nü Commissioner and Secretary, Rural Development, Neposo Theluo ajanga semzükja liasü.

Iba sentong nung jembiba mapang department-i agütsüba sen ochishia amshia iba mapa takok ngua inyaktetba atema Commissioner & Secretary ajanga putu menden nem tenüngsang agüja liasü. Scheme balala mapa kuma inyakba mapang sorkari agütsüba guidelines tem shidak amshitsü pai ajungshia liasü.

Market channel ya kanga tongtipang lir, anungji bazaar amenba yimya sübatsüla aser pei alu nung züsentetba chiyongtsütem anasa aliba yimtsüngtem den melentepba

sentong alitsüa, ta pai ashi.

Zangdi yimtsüng nung alirtem shilem 90 bo aluyimer asünung parnoki alu nung züsentetba ayokba nungi jangratema litetsü, ta pai ashi. Iba atema tang semzükba weekly market ya ajanga teyari tulu agütsütsü amanger, ta ashi.

Makamait samadaksütsü atema department-i yimtsüngtem yaria marketing sheds yanglutsü asoshi temolung agütsür, ta paisa shisem.

October 2, 2021 nungi January 31, 2022 tashi agitsü aliba People's Plan Campaign on Gram Panchayat Development plan nung inyaksü atema putu menden dang sentong tapet yanglutsü ayongzükja liasü.

Iba sentong nung ADC, Jalukie, Dr. Tinojongshi Chang, NCS aser Addl. Director, RD, Tsalito natia jembia liasü. Iba marketing shed ya meshiteta Pastor Shepota Nusori (JBC) ajanga sarasadema liasü.

Peren nung Smoke Free District campaign tenzükogo



Additional Deputy Commissioner Office, Peren nung Smoke Free District campaign tenzükba sentong nung adenerem tangokba noksa ka yangi angur.

Dimapur, Rongjui/Sept. 21 (TYO): District Tobacco Control Cell, Peren ajanga September 16, 2021 nü Additional Deputy Commissioner Office, Peren nung Smoke Free District campaign tenzükba sentong ka ayongzükja agia liasü.

Iba sentong nung Dr. Sabino Kuotsu, Senior Dental Surgeon cum District Nodal Officer ajanga onük nung ajemdaker jembia.

K. Mhathung Tsanglao, Additional Deputy

Commissioner, Peren ajanga moko achiba tebilemstü indang jembia aser moko ya adangji nung tebilemstü tuluka lir aser asenok ajaki lokti tentet balala den yaritepa nüburtem nem iba tebilemstü angatetdaksütsüla, ta shia liasü.

Paisa nüburtem aliba tesemtem nung moko machitsü ozüng akang-akang amshitsü atema nüburtem nem tali tejangjaba angatetdaksütsü asoshi poster campaign aser danga

mapatem inyaksüla, ta ashi.

Iba sülen pai Smoke Free district campaign tenzükja liasü.

Iba senden nung dena aliba Peren Town Women Welfare Association lenirtemi DTCC Peren yarisema campaign nung yariteptsü aser shilem agitsü molungsoa agizükja liasü.

Iba sentong nung Peren Town Women's Welfare Association, Peren Town Students Union, Trader's Union aser Chairman Union tem nungi dena liasü.

Sonowal-i Rajya Sabha by-election atema tenüng agütsü



Mongulbarnü Guwahati nung Assam Chief Minister Himanta Biswa Sarma lia Union Minister Sarbananda Sonowal (abelen)-i Rajya Sabha by-election atema nomination papers agütsüdang agiba noksa angur. (Guwahati, September 21)

Guwahati, September 21, 2021 (Agencies): Mongulbarnü Union minister Sarbananda Sonowal-i Assam nung Rajya Sabha by-election atema nomination papers agütsüogo.

Assam chief minister Himanta Biswa Sarma, Assam BJP president Bhabesh Kalita, agriculture minister & AGP president Atul Bora, handloom & textile minister UG Brahma aser Water resources minister Pijush Hazarika nung lia Sonowal-i Assembly secretariat

nung nomination papers agütsü. Iba mapang BTC mendenbuba & United People's Party Liberal (UPPL) president Pramod Boro aser Rajya Sabha MP Bhubaneswar Kalita naprong liasü.

Union minister for shipping, ports, waterways and Ayush, Sonowal ya Majuli Assembly constituency nungi lir.

Assam nung BJP-i aniba sorkar akümba sülen party high command-i chief minister inyaksü atema Himanta Biswa Sarma shimba osang

metetdakja liasü.

North East Democratic Alliance (NEDA) convenor Himanta Biswa Sarma-i Assam chief minister inyaksü tenzüka sülen Sonowal ya Narendra Modi ministry nung Cabinet minister kümdaktsü.

Modi'er sorkar mezüngbuba kümsük nung Sonowal-i Union minister of state for sports inyakogo.

Assam nungi BJP züngsem Biswajit Daimary-i Rajya Sabha menden toktsüba sülen tazüng aküm.

Assam by-election nung Congress-i kija tokteptsü: Bhupen Bora

Guwahati, September 21, 2021 (Agencies): Assam by-election nung Congress-i kija dang tokteptsü ta state party president Bhupen Kumar Bora-i metetdaktsü.

By-election agütsü aliba menden 6 nung onoki candidate tem shimtsü, ta pai ashi.

"Taküm küm tetenzüklen assembly election agidang Congress-i külem yariteper teloktem nem constituency lemsükja tamakok angu aser item nung takok ngunür" ta Bora-isa ashi.

MLA teinyakdak nung asüba aser menden toktsüba ajanga Assam nung assembly menden 5 tazüng lir. Külen, MLA ka Union minister akümba sülen ano menden metoktsü lir.

"Onoki teloktep tentetba ajanga Bodoland Territorial Region (BTR) amala tesemtem nung onok tashimait aküm.

Onoki metoktepba constituency tem nung ozü züngsemtem tezü atang. Onoki item menden tashi itshitsü" ta Bora-i Guwahati nung osangbener dang ashi.

Party züngsemtem ajungmesotsü aser 2024 nung Lok Sabha election aser 2026 nung assembly election dak rangloker Congress-i by-election nung kija dang tokteptsü, ta paisa shisem.

Züngsem 126 agi akümba Assam Assembly nung Mariani, Thowra, Bhabanipur, Tamulpur, Gossaigaon aser Majuli constituency tem nung by-election agütsü.

Congress MLA ana aser AIUDF nungi MLA kati BJP nung adenba sülen assembly menden nungi toktsü.

Maneni, United People's Party Liberal (UPPL) aser Bodoland People's Front (BPF) nungi MLA ana tashi asü.

Assam & Meghalaya education minister temi International Centre of Excellence lapoktsü



Assam aser Meghalaya nungi Education minister temi International Centre of Excellence at the University of Science and Technology, Meghalaya (USTM) lapoktsüba noksa nung angur.

Guwahati, September 21, 2021 (Agencies): Assam aser Meghalaya nungi Education minister temi International Centre of Excellence at the University of Science and Technology, Meghalaya (USTM) lapokgo.

Assam education minister Ranuj Pegu aser Meghalaya education minister Lakhmen Rymbui nati International Centre of Excellence lapok.

Iba mapang Rymbui University campus nung liasü aser Ranuj Pegu-i online ajanga shilem agi.

"USTM nung lapokba International Center of

Excellence (ICE) yagi Northeast region renlokba nung tongtipang shilem agütsü" ta Assam education minister Ranuj Pegu-i ashi.

"USTM-i Construction Industry Development Council (CIDC) den yaritepa Northeast nung human resource renlokdaaktsü" ta Meghalaya education minister Lakhmen Rymbui-ia ashi.

"USTM indang tamendakdakji entrepreneurship aser research lir" ta USTM chancellor Mahbul Hoque-ia ashi.

"2030 tashi nung USTM ya alima nung university tajung ka

kümdaktsütsü nükjidong lir aser CIDC-i yaritepba atema pelar. Iba university anogoshia tajungba akümer aser International Centre of Excellence lapokba ajanga Northeast nung aser temeket aliba linüktem nungi lanurtemi nem shisaliok agütsütsü" ta Hoque-isa ashi.

ICE nung schools aser fraternity chapters 17 alitsü. Itemji School of vocational studies, School of construction Quality assessment & health assessment of structures, School of Trenchless Technology, School of Arbitration, Conciliation & Dispute resolution, School of Technical consultancy, School of Drone technology & GIS studies, Student Chapters of ECI, IndSTT, ICC, School of Internships for young engineers, School of skill Assessors training, School of non-conventional Energy studies, School of Production/Manufacturing process, School of Artificial intelligence, School of Faculty development, School of Subsurface Investigation, School of Surveying, School of Project Management, School of Surface Transportation lir.

India kübok Northeast aser Nepal, Bhutan, Bangladesh o Myanmar ama linüktem nungi kaketshirtem aser research scientists-i ICE ajanga tajangzük tulu angütsü.

Heritage Aviation-i Northeast nung helicopter services tenzüksü



Guwahati, September 21, 2021 (Agencies): Delhi nung amenoka aliba Heritage Aviation-i Northeast region nung helicopter service tenzüksü.

Heritage Aviation ya India nung kanga kara ainba helicopter & aircraft charter company tem rongnung ka lir.

Government of India indang UDAN scheme kübok helicopter services tenzüksü atema parnok nem tesem kar lemsüktsüogo.

"Onoki tetenzük nung Guwahati-Nagaon, Guwahati-Tura aser Tura-Shillong atema 7-seater (Airbus H 130T2) helicopter services tenzüksü. Anogoshia Guwahati-Nagaon o Guwahati-Tura tsüngda tayimtsü anaben senzütsü aser

Tura-Shillong nung ka senzütsü" ta Heritage Aviation CEO Rohit Mathur-i ashi.

"Onoki November ita nungi helicopter service tenzüknür" ta paisa ashi.

"Onoki Guwahati-Shillong tsüngda senzütsü atema asüngdangogo saka tang tashi ministry nungi ano temelaba mangu lir" ta Mathur-isa ashi.

Ministry of Civil Aviation (MoCA)-i September 17 nü temelaba shidi agütsü aser November 2021 nungi mapa tenzüksü sentong lir.

Heritage Aviation ya 2009 küm tentet aser idangji Uttarakhand kübok Guptkashi nung helipad tila ka nungi senzü. Kedarnath temple-i orr arurtem anishitsü atema parnoki mezüng helicopter services tenzüka liasü.

Manipur tsür Thounaojam Brinda-i election nung tokteptsü

Imphal, September 21, 2021 (Agencies): Manipur nung tasütait police ketdangür Thounaojam Brinda-i 2022 Manipur Assembly Election nung tokteptsü.

Lai Yaikul Assembly Constituency nungi tokteptsü.

Taoba Additional Superintendent of Police Brinda-i 2018 nung mozü aika apuba sülen tetshitsü tenzü.

Kasa küm lai Chief Minister's Police Medal for Gallantry ngua liasü.

Manipur Chief Minister-i Zou chioktsü atema rongshir ta 2020 nung Thounaojam Brinda-i court document ka agütsü.

Laisa Manipur chief minister dak tai tongloksü aser tatem nung Additional Superintendent of Police mapa nungi anen.



TIR YIMYIM YIMOBILEM (EDITORIAL)

DIMAPUR RASEMNÜ, RONGJUI (SEPTEMBER) 22, 2021

Gari lenmang ya shibai repranger?

Mokokchung nungi Dimapur-i alutsü atema Amguri leni alu tajungba asü, Mariani leni alu tajungba? Mesüra Wokha leni ao tajungba (?) ta aiben osang agitepa shisadanger külenang telemtetba agitsüsa akümer, kechiyong lenmang asem pronglaji toktepa majung, anungji tamajung asem rongnungji tera tajungba ka shimtetsü. Aji oda, bilemdanger kari Wokha leni Kohima ajanga aotsü apusor aser teimbakati Assam ajanga aotsü atema Amguri leni aoer. Atangji, Mokokchung nungi Dimapur tonger külen, ano taoksatsüka, Dimapur yimti yimdongsa majungba kümer angur. Assam ajanga senzür asoshi balaka kasa gari lenmang aser kasa National Highway-sa süaka Assam nung National Highway nung jajadangbo ali nung jajar memesük kenyonji gari arakzüka memeteter aser matashir, anungji gari toudak nunga süngo jema otetter. Ajsüaka, Nagaland nung akaba National Highways nungbo gari tajungba majung amato ola tapu tapu adoka meküpsishia jajar, anungji gari telong nung tamdaksüla ka nung zep ta ameter memenra, gari telong nung yirutsü. Assam lima National aser state highways nungbo lenmang tezü anatsülen prongla ali toka süsümedema yutsür, saka Nagaland nungbo National aser state Highways na prongla nung anepalurtema kata mali amato, kilentzü tilaka yapoka yutsür mali, tarok tapa atepa anepalutsübo aonung pongmang aser lenrü aser lenkalen nungi kümbok aser süngdong meyiba agi lenjaka mangu sakbangaka itemji ayipdoka len pitsüa inyaker (labour) mali, lenmangbo National aser state highways saka arema nema jajar. Iba jagi gari aika tip anatsülen, tapayutsüka oksar senzüya angutsü. Iba amaji gari kechi sentsüar mereprangtetsüsa lishi agi tepbanger aser tip anatsülen kari line asüa yutsü amato oksar senzüya ngura, item garitemjibo Nagaland telong nung jajaba garitem asütsü. Ashiko, lishi agi tepbanger senzüya aliba garitem telong nungjibo aliibo alutsüla masü, kotsüanga mereprang jungjunga sübotetter mena akatsüa akok. Tanübo, tangar dangbo ashitsüla masü saka aji asen Nagaland lir. Amguri, Jorhat aser Mariani len nungi Mokokchung leni Tuensang aser Kiphire tashi gari tila dang masü saka khu abenba gari tulu jajar aser itemji tesem tesem nung tarok tapa nung tetsüng asongoka yur parnoka moutet aser tangartema ajanga mesüitet ta gari raksabajibo tezü saka nisungtem tatongtsü ka metongtet lenmang nung anogo süidaksütsüsa akümba takoksaji sükdangra, lenmang anepalutsüba sen dang nungi kanga agia teimba adoktsü. Terepranger mali nungji, joko lenmang agi awatsüng kümdagi aser yangji tzünglu arudang motzü atsünga aliba agi tarok tapaji mangu gari tila asongoktsü aser tetsüng ana aketba gari nung senzürtembo yangji akuzüka tsüka yirutsü. Government ket nung sen ali mali ta masü saka government lenmang anepalutsü asoshiho teti sen lir, ajsüaka asenoki senji chiadoker lenmang tamajung nungang arema jajaner. Taoba Nagaland angh Ravi alidangbo pa-ang PWD Road & Bridges aser National Highways minister amato kümer, Dimapur aser Kohima na tsüngda lenmang yanglurtem dang nungi anogo shia teinyakba osang meshitsü aser hapta nung kenbo ajurua lenmang yangluba indang jembitsü ta asüba agi, Dimapur len nungi Chumukedima tashibo tangar lima mesüka lenmanga yangluogo aser street light-a tsükloker aser tanüngba mapatemji meranga inyakdagi. Asen limalen lenmang tamajung nung temulung ajak amsaa senzüdang, R.N.Ravi ama ka, yimten tashi bener Mokokchung nung ita ishika danga alinungbo Mokokchung nungi Tuensang-i aoba aser Kohima, Mariani aser Amguri leni aluba lenmangtem ajak ya shitakba National aser State Highways ama anepaludakja lila ta bilemer. Atangji, Mokokchung district kübok lenmang karbo National Highway 2 lane küma yangludagi saka ano talangbalen ka mekongshii lir, anungji two lane highway inyakerteri meinyak tashi state government-i National Highway anepalu masütsü ta asünungbo, State Highway department maliang tajungba, kechiyong lenmangji tangar company-i inyaker aser itemjibo PWD nungi mashi kati reprangtetsü. Nagaland nung department-bo aika anungji tekolaka aika saka nübertem asoshi bilemba tekolok aser temulungjang mali, tekolak aser temang dang, iba jagi lenmang tamajung nung nübertem timatemba aser akoksaba mangur aser shishia mebilemtesür. Ibayongji, Nagaland nungbo gari lenmang repranger mali, lenmang ajak arem aser awatsüng küma menendokdagi. Ajsüaka, nübertemia ola madoker, kechiyong asenok ochimashiba sen agi onsara pezü pezüa kümdaktsü nung, lenmang majungba agi gari telong nung jokshishia aser langkoshishi küma senzüyonga memetetter.

OLEMSABANG

Ajak asoshi osang tajung ka

~ S. T. Yapang Lkr. Kohima

Ner ki tejen, anungji ki sünür, saka sen maka ta ali asü? Na manemshilu agi tonga dang alir, na mozüki bushitsüla ta bilemer, saka sen maka asü?

Kü temeimbatem, ata liang memenui temeim mapa inyaker aser teyarinür poktetba mongpu tajungtiba koba dang temoatsü election ta ajar ato arudaki.

Na shisatebulu, nai dang anogo ishika aremzüka ata liang, memenui missionary aika poktettsü, parnok jaki ner ki asüba nung yaritsü, na mozükilen senzüdang na bushia arua yaritsü, saka nai metetsübaji naji ajak den dena ali ama dang jembishinüa liang, yamajisüra temeimerji tali züintsü.

Tang yongi tesem aika nung election missionary pokteta temeim mapa jenti inyakdaki, oda onsara teyarinü tesa, onsara tenjungnü, iba den tarutsü asoshi inyaksütsü jenti nangzüka ashir "tang menden nung mena alisangi ne nem kecha magütsü, saka nai ni ashiba angara na sorkar mapa anguba nung mezüngbuba asütsü, aser sen ya agiang yabo sali moko chia atsüba dang, adoker timba agütsütsü" iba kasa oji nisung 500 dang ashir, iba den pai sen kibur dangji ne nem agütsüba osang yoker aser na asür kaket nung zülüoker.

Minister, MLA den inyaker mesüra pa den külemi alir aika maden aotsü aser nübur mesüzüka ashir "Pai kecha meinyaktet, mapa tilaka inyakba ajak to ni inyaksüba dang" saka paji tenyaba mapa angar ka liasüba lir, tang pai ne dang ashir, ano taruba nungjia adokra pa/la tangar tenyatemonger ka dang asütsü aser ano ashitsü "nibo na yarinür, saka menden nung mena alisangi kecha meinyakteter." Tamakok ajak tangar dak dang tai tongloksür, takokbo pei inyaktet ama jembir dak shirnoki mulung alemmer, parnok amfang nung aurong tera zütsük agi amongbang ama ajurur.

Election nung sen indoker aika dang adianu aser kinunger ajaki ashir "na adoktsü masüar sen ya meindoki jangratema chia jema liang" saka item kinüngertem jaki Laishiba memeteter agi jembir, kechiyong ya zülua lir, Apijemtsü Shin 23:4 nung "...kechiyong aoksa rongsen dak tashikang atener orija ama anüngleni yima oadoker."

Rongsen dak tashisang dener yima aoba nai aji nokdangtsü makoktsü, ajimesüra Laishiba ya tiyazü asütsü, anungji sen meindoktsü tajungshi, iba melen nai ya ashitsü junger "Nai nübur asoshi aruba sen koba ne arishi piyong auyadena yua lir, naya poisa kata manüngzüki patokang."

Ajasünung arung sen ya lemdu süra timba timba lemmang, nisungtemi "onok joko sen makoker" ta mashi tashi mesüra "ozü ki sünga bendenogo joko tayudak makar magili" ta mashi tashi lemjang.

Ano kiraklongrar karibo yamai inyaker, pa yimeri shimdaksütsü asoshi sen ishika indoka mesüzüktsü, kodang shimdir yimden tashi ajanga pa asoshi sen saruteptsü aser aji aleper ayutsü. Pai yimer asoshi sen 1 indokra yimeri sen 100 agütsür, yangji pai sen 10 indoker 90 pa ayur, yaa shishilembaba mapa tajungtiba rongnung ka lir, koda temoatsü aser azükaru! Par nübur jaki ashir "tekülak aser ashioksüba mapa" saka parnoki metetsümonga aser o tajung anga temulung lemja lemer yimdongzü nem shi nükdaktsü nungji anemer chuba menden nung amenba metzü alua reprangtsübaji par shilem asütsü.

Ya temoatsü election, teyarinür, temeimer aser tejungnür zünba mongpu koda jangratemtsü! Saka nai ya metetang, item temeimertem ya ne senti azü jema parnok jangratema taküm alitsüba asoshi na kanga nungtaker, parnok tzübu tarok nungi ne dak ajemdaker pongteta tugutsü na nentaka bushir.

MATRIC FAIL ASÜBA AGI TSÜRAPURI TANUR DEN JEMBR

~ N.R Ao, Dimapur

TETSÜ TAJUNG:

- 1) Na fail asüyonga kecha masü.
- 2) Na tananben angazükshitsü mapang tajung.
- 3) Tsüngremia teti takok dangbo magütsür.
- 4) Na ama tangara fail süogo.
- 5) Na school-i aodang lendong majuru.
- 6) Na ken danga meshirang.
- 7) Na sangküm pass asütsü.
- 8) Nai tejashi tejak onok dang tesayu.
- 9) Tamakokji takok tongshi lir.
- 10) Arung sarasademtsüdi.

TEBU TAMAJUNG:

- 1) Hai! Poksaba fail asüa na?
- 2) School-i aodang endokba sen bushiang.
- 3) Tangar lesson bushidang na kong liasü?
- 4) Na kidang alitsü medemsü!
- 5) Kibong dangi maksü tulu bener arutsüogo.
- 6) Asenok yimtak koda senzütsü?
- 7) Na chia chiyungtsü malang;techiyong no!
- 8) Na school azüngtsü metemsü.
- 9) Fail asütsü school-i ao no?
- 10) Nia tang tatidang agütsü nung fail-bo asütsü.
NA KOBALA TSÜRABUR?

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Mahant Narendra tepsetertem nem temerenshi agütsütsü: Yogi



Mahant Narendra Giri

September 21, 2021 nü Prayagraj nung Akhil Bharatiya Akhara Parishad Tir, asür Mahant Narendra Giri Maharaj nem akhüm agütsütsü atema Samajwadi Party Tir, Akhilesh Yadav arudang tangokba noksa nung angur.

Allahabad, September 21 (Agencies):

Mahant Narendra Giri asüba ken o bushisingdangdar aser aibelenertem nem temerenshi agütsütsü, ta Mongolbarnü Uttar Pradesh Chief Minister, Yogi Adityanath-i metetdaksü. Hombarnü Allahabad kübok Baghambari Math nung Mahant sür lia angu. Pa ya India nung sadhu organization tulutiba, Akhil Bharatiya Akhada Parishad nung Tir liasü.

ADG (Allahabad zone) kübok police aser

Commissioner, Allahabad longjemer team ka ama inyakdar, ta chief minister Yogi-i metetdaksü.

Asür nem akhüm agütsütsü atema Yogi Allahabad-i oa liasü, aser yangji osangbenertem den jembidang Yogi-i, Mahant asüba indang kuli ajak bendendar aser kobi melii ajak jungkai adoktsü aser aibelenertem merenshitsu, ta metetdaksü.

Mahant sülen anidakertemi aginüba ama nisung ajaki akhüm agütsütetsüsa Mongolbarnü pa tasümang yimjak nung ayu.

Yogi Adityanath-isa,

Bodhbarnü züngsem pongui akümba team kati tasümang post-mortem agitsü, iba sülen ang Hindu yimsü inyakyim nung aliba ama 'samadhi' nung anisüngzükdaksütsü, ta metetdaksü.

Hombarnü police-i ashiba agi, Mahant tasümangji tsüngbang nungi lisü agi alener lia angu. Iba tesem nungji soseta asüba shidi ka tapak 7-8 nung zülur liasü. Shidi nungji Mahant-i, pa temelungjang shisatsü nung minprong aliba ajanga pasasa taküm agir, ta zülua lir.

Sorkari Hindu aser Muslim tsüngda telemsa adokdaksür: Mehbooba

New Delhi, September 21 (Agencies): Mongolbarnü People's Democratic Party (PDP) Tir, Mehbooba Mufti-i, taoba mapang Ato kilonsertem-Jawaharlal Nehru aser Atal Bihari Vajpayee nunger ama lenirtem dakbo mangdang liasü, ajisüaka tan aliba sorkaribo Hindu nunger aser Muslim nunger tsüngda telemsa adokdaksür, ta aitsü.

Taoba mapang Jammu & Kashmir Chief Minister, Mehbooba-isa, Delhi nung alirtemi union territory ya (Jammu & Kashmir) laboratory ka ama amshir aser tetendangba agir, ta ashi.

"Delhi nung alirtemi Jammu & Kashmir ya laboratory ka

ama amshir aser yangi tetendangba agir. Nehru aser Vajpayee ama lenirtem dakbo Jammu & Kashmir atema mangdang liasü saka tang aliba sorkaribo Hindu aser Muslim nunger tsüngda telemsa ang adokdaksür. Tangbo Sardar tem Khalistani kümtsüogo, onok Pakistan nunger aser BJP ang India nunger kümtsüogo," ta Mehbooba Mufti-i ashi.

Anogo ana tejaklena lai, BJP-i vote angutsü nükjidong nung Taliban, Afghanistan aser Pakistan tetshia politics asayar, ta aija liasü.

"Elections agitsü mapang ana nung lir. Tangbo parnoki (BJP) Taliban aser

Afghanistan onüktem tetshitsu. Iba jagi tajangzük mengura parnoki Pakistan tetshitsu. Parnoki 'drones' indang jembia aruogo. Parnoki China indangbo mejembir, kechiyong parnok anüdoklen Ladakh telungi aitogo . Tetsübu lidaksütsü atema parnoki Taliban, Afghanistan aser Pakistan tetshir aser vote meshia mapa balala inyaker," ta lai aija liasü.

Mufti-isa, "Tesüiba küm 70 tsüngda Congress aser Jammu & Kashmir nung tanga party temi inyakba ajak küm tenet tsüngda BJP-i raksatsüogo. Parnoki nüburtem nem timtem bener arutsüogo," ta lai jembia liasü.

PM Modi-i September 22-26

anogotem nung US semdangtsü

New Delhi, Rongjui/ September 21 (Agencies): Ato kilonser, Narendra Modi-i September 22-26 anogotem nung United States semdangtsü, ta Indian Foreign Secretary, Harsh Vardhan Shringla-i metetdaksü.

Shringla-isa, September 24 nü Ato kilonser, Modi-i US Tir, Joe Biden ajurua linük ana dak sendakba onüktem nung o lemteptsü, ta metetdaksü.

Modi aser Biden nati linük ana tsüngda shishilembaba aser investment tesendaktep tajungba akümtsü, defence aser security tesendaktep tashi taitba akümtsü aser clean energy partnership tajungba akümtsü atema jembitsu, ta pai metetdaksü.

Osangbenertem den jembidang Shringla-i, "Senden nungjisa Afghanistan nung Taliban sorkar tentetba sülen

region nung security tensa atema jembitsu. Onokisa arrtsü adena kiralongraba aser alima nung kiralongra networks raksatsütsü atema jembitsu," ta metetdaksü.

Modi-i US tatong Tir, Kamal Harris-a ajurutsü.

September 22 nü US Tir, Biden-i ayongzükba Covid-19 Global Summit nung Ato kilonser, Modi-i shilem agitsü, ta Shringla-i metetdaksü.

Modi den tongti ketdangsertem aika US-i aotsü aser parnok rongnung external affairs minister, S Jaishankar aser National Security Adviser, Ajit Doval na densema lir.

Quad lenirtem summit nung Australia aser Japan Ato kilonsertema adentsü aser Modi-i United Nations General Assembly (UNGA) nunga jembitsu.

Udhampur nung Army indang helicopter ka tsükok; pilot anaprong asü



September 21, 2021 nü Jammu & Kashmir kübok Udhampur district nung Army helicopter ka tsükokba tesem anasa police aser nisung adenshia aliba noksa nung angur. Iba lendong nung pilot anaprongla süogo.

Jammu, September 21 (Agencies):

Mongolbarnü Jammu & Kashmir kübok Udhampur district nung Army indang chopper ka tsükok, ta ketdangsertemi metetdaksü.

Udhampur kübok Shivgarh Dhar area nung anepdang 10:30-10.45 ako tsüngda chopper ji tsükokba sülen yangji alirtemi chopper telung nungjagi pilot anaprong agitet.

Helicopter ji army aviation corps meyong liasü.

Northern Command nungi

defence otongdar kati, army helicopter ka tsükokogo aser tekaraba nung Army-i sangdong ka agütsütsü, ta metetdaksü.

Pilot anaji Major Rohit Kumar aser Major Anuj Rajput na liasü ta jangjaogo.

Defence otongdar, Lt Col Devender Anand-i, "Helicopter tsükokba lendong nung pilot anaprong mejungi yirua anasatiba medical facility kati anir ao saka mekümsükteti süogo," ta metetdaksü.

India nung ano nisung 26,115 dak Covid putet aser 252 asü

New Delhi, September 21 (Agencies): India nung ano nisung 26,115 dak coronavirus putet, aser tang tashi nungbo linük nung nisung ajak senteper 3,35,04,534 dak iba tashidak putetogo, ta Mongolbarnü Union Health Ministry-i metetdaksü.

Tang India nung coronavirus agi teshirangdakpur 3,09,575 dang lir aser ibaj tesüiba anogo 184 tsüngda teshirangdakpur tajemba lir, ta Health Ministry-i metetdaksü.

Tesüiba ghonda 24 tsüngda coronavirus agi shiranger 252 süogo aser tang tashi nung iba tashidak agi shiranger ajak senteper 4,45,385 süogo.

Tang teshirangdakpurtemji coronavirus caseload nungi shilem 0.92 dang lir aser iba tashidak agi shiranger shilem 97.75 anepogo, ta ministry-i metetdaksü.

Tang India nung hopta shia coronavirus positive putetba shilemji 2.08 lir aser anogo shia positive putetba shilemji 1.85 lir.

Tang tashi nung samples ajak senteper crore 55.50 tendangogo, ta Mongolbarnü Indian Council of Medical Research (ICMR)-i metetdaksü.

Taküm January 16 nü linük nung vaccination tenzükba sülen tang tashi nung coronavirus vaccine dose crore 81.85 agütsüogo.



September 21, 2021 nü Mumbai nung Healthcare workers-i vaccination camp ka nung Covid-19 vaccine agütsüba noksa nung angur. Vaccination camp ya Aditi Puri Charitable Trust-i Valia College nung ayongzük.

Suu Kyi-i mapatamajung inyaktsü ajungmesoba keno jembibi



Naypyidaw, Rongjui/Sept. 21 (Agencies): Myanmar indang mitkar sorkari yimsüsüba menden nungi atsüngdoker alila Aung San Suu Kyi-i mapa tamajung inyaktsü ajungmesoba ken o benoka jembibi, ta lai okatsürtemi ashi. La anema ken o aika benoka aliba rongnung ibai ka lir, aser yangji lai aitsüra küm aika tepuokdak ayutsü.

Aung San Suu Kyi aser lar National League for Democracy telok ya mitkartemi February ita atsüngdoka liasü,

aser iba yangji nüburtemi anema nokdak aser yimsüsür anemertem pua merenshia arur.

Iba sülen arishi küm 76 tain Nobel Peace Prize sempet ngur alila ya kidang pua ayu aser lai alima den sendaktepba ajunga agi lar okatsürtem den senden amenba aser okadak ken o jembiba kisüing lir.

Mapa tamajung inyaktsü ajungmesoba nung lai aibelenba mali ta lai nangzük, ta lar okatsür Khin Maung Zaw-i Mongulbarnü ashi aser la temang junga lir amai ajitet, ta

ashi, shiba temang majungba mechi hopta ka tejakdang ken o danga ka jembiba nung shilem magiteti liasü.

Ken o shia tepuokdak küm asem tashi ayutsü ozüing nung lir. Tir menden nungi atsüngdoker alisang Win Myint-ia kasa ken o nung aibelenba mali, ta nangzüka liasü.

Mongulbarnü okadak prosecutor temi kuli agütsüba nung taoba küm lar teloki kanga junga takok ngutetba election nung Aung San Suu Kyi-i coronavirus tenokdangba ozüing nung aibelenba indanga jembiba liasü, ta lar okatsüri ashi.

Taruba ita ano lai ochimashi mapa inyakba ken o tasen ka benoka jembitsü lir, aser ano la ya colonial-era secrecy law nung aibelen, ta tai tonglokja lir, saka iba ken o yabo ano court dangi maru.

2020 election nung vote agütsürtemi ashikülak mapa inyak, ta tai tonglokja lar NLD sorkar atsüngdoka liasü.

Mitkartemi sorkar atsüngdokba sülen sepaitemi civilian 1,100 dak tema takum samatsüogo, ta yangji aliba monitoring group kati ashir. Saka mitkartemibo asür ya iba dang nungi kanga agi tajemba lir, ta ashir.

Canada election: Trudeau-i maneni yimsü asütsü

Ottawa, Rongjui/Sept. 21 (Agencies): Justin Trudeau'er Liberal Party-i Canada election saksaka akok saka menden timbabo mongutet.

Trudeau asoshi ibai federal election asem buba nung takok angur alitsü, saka pa anemertemibo election ya mapang indokba dang lir, ta ashir.

Liberals temi menden 156 nung takok angutsü takzua lir, koba Trudeau-i majority angutsü atema menden 170 nungdaka liasü.

Conservatives tem ya maneni opposition telok tongtiba asütsü aser parnoki menden 122 shi angutsü imlar.

"Vote tem ano mezüingma saka Canada nung million aikati terenlok sentong shimogo ta taonung asenoki nguogo," ta Trudeau-i Mongulbarnep Montreal nung pa busemer dang ashi.

"Na atema raraba sorkar ka nai shimtet," ta pai ashi.

Canada nung COVID-19 tashidak wara wave pezububa lia iba election ya agi, koba linük otsü nung sen timtiba indokba election liasü, kong sen million C\$600 (\$470 million) shi indoka liasü.

Küm ana tejakdang 2019

küm shimtetba den kanga mesüktepba parliament ka alitsü ama takzüteta lir.

Mapang metongjungi election agiba ajanga Canada nung ana nung election tanaben agütsür liasü, koba aikati Trudeau-i majority sorkar ka kumtetsü merangba ama angateter aser pai iba election agitsü nungdakba rasaa meshitet. Conservative lenir Erin O'Toole-i iba election ya mapang aser rongsen indokba ka lir, ta ashi.

"Sen million \$600 indoka Canada nungeri pa ano minority jenjang nung yok aser asen linük nung telemsa tali adokdaksü," ta pai osangbener dang ashi.

Trudeau-ibo election ajanga sorkar tasenba nem tejakleni aotsü lenmang tejangja lapoktsür, ta ashi.

Pa election nübuyimba mapang vaccine anemertemi temdangsünanga liasü aser kari COVID-19 mozü magitsü, ta ayimtena liasü.

Ano anogo ishikabo vote azüingtsü, kechiaser taküm election nung mail ajanga vote million ka shi agütsü, ta election ketdangsürtemi ashir aser tang züingser aliba tema ano tatem kati marutet lir.

Taliban-i deputy minister tem shimogo, tetsür kata mali

Kabul, Rongjui/Sept. 21 (Agencies): Taliban sorkari par interim cabinet ulushia Mongulbarnü deputy minister tem shim. Saka tetsür kata meshimok, anungji ita tetenzüklen tebur kisüing cabinet nung shimokba anasü agi tali akumer.

Linük balalai Taliban dang par mapa nung ajemdaker bendangtsü ta shia lir, aser Taliban-i aniba sorkar agizüksü asoshi parnoki tetsürtem aser kin tilatem amshiba nung ajemdaksü, ta shia lir. Parnoki 1990s tatemlen Afghanistan nung yimsü asüba mapang tetsürtem school, mapa aser yimjak nung nokdanga liasü.

Brehostibarnü osangbener senden ka nung jembiba mapang Taliban sorkar indang odongtar Zabihullah Mujahid-i cabinet nung nübu tasen shimokba bukuma jembibi aser yangji Hazaras ama ethnic kin tilatem nungi züingsemtem inoksema lir aser tetsürtem meilongi inoktsü, ta ashi.

Par sorkar agizüksü atema linük balalai teinyaktsü ashiba atema Mujahid-i ain adoka ashi aser ibaji soita ayutsü kuli kecha mali, ta ashi.

"Ozü sorkar agizüksü aser tesendaktep alitsü ya European, Asian aser Islamic linüktem densema United Nations mapa lir," ta pai ashi.

Taliban indang caretaker



Taliban sorkar indang odongtar Zabihullah Mujahid-i Kabul, Afghanistan nung osangbener senden ka nung jembidang tangokba noksa nung angur. Taliban-i minister aser deputy tali shimloka par interim cabinet ulushiogo saka yangji tetsür kata meshimok. Meilongi cabinet nung tetsür shimoktsü akok, ta Mujahid-i ashi saka osang tejangja magütsü.

government nung minister aser deputy minister kar shimokba sangdongtsü atema pai mapang agia liasü.

Nübu tasen shimoker ya Panjshir aser Baghlan nungi densema lir. Panjshir ya National Resistance Front aliba tesem ka lir, aser parnoki Taliban-i linük ajunga agiba nokdangtsü meranga nokdaker.

Baghlan nunga taoba ita district kar nung Taliban yimsüsüba anema nokdaka liasü. Menden tasen asem Panjshir, Baghlan aser Sar-e-

Pul province nung alirtem nem agütsütsü sangdong, kong Tajik aser Uzbek nütsüing aika lir, anungji Taliban sorkar nung kin ajunga adenba amai sayur.

Taliban-i iba cabinet ya interim government ka ama züingshir, anungji melenshitsü akok ta sayur, saka parnoki elections agitsü atemabo mejembir.

Tang osang tasen sangdongba yagi linük balala molung makoktsü amai ajitet, ta osangbener kati Kabul nungi ashi.

"Linük balalai tashi tait interim government ka aginür ta ashir, kong Hazara, Uzbeks aser Tajiks densema ethnic kin balala nungi züingsemtem aser ano iba interim government nung taoba yimsüsürtem tongti shilem agidaksüner," ta osangbeneri ashi.

Taliban-i constitution aser election temzüing tasen yangluba mapang interim government nungya linük balalai tetsürtem aser kin tilatem nungia teshimtet nübutem aginer, ta pai ashi.

"Afghan nüburi nungdakba ama iba interim government yagi telangzüba agütsür ta linük balalai magizükteter," ta ashi.

Taliban dang kin ajunga nungi sorkar ka tentetsü atema ajungshiba linüktem rongnung kidanger Pakistan densema lir.

"Tajiks, Hazaras aser Uzbeks densema Afghan sorkar ka atema Taliban den ni anir jembishinü tenzük," ta Ato Kilonser Imran Khan-i Twitter post ka nung ashi.

Ajak adenba sorkari Afghanistan nung yimchi-yimjung bener arutsü, ta pai ashi saka Taliban-i magizük.

Iba olen nung Mujahid-ibo telangzüba magütsü saka danga Taliban ketdangsürtemi ozü yimya nung inyaktsü temeden lir, ta langzü.

Mongulbarnü Mujahid dang tawa tetsürtem nem tenokdangba agütsüba aser khen atema class trok nungi 12 tashinung tetsür azüingtsü memelaba atema asüngdanga liasü.

Mujahid-i iba telemtetba ya khen atema agiba lir aser parnok school-i aotsü atema yakta sangdongtsü, ta ashi.

Tetsürtem kakat rejui meyipa aotsü atema sentongtem yanglua lir, ta pai ashi saka iba dak tali rasaa mashi. Class trok nungi 12 tashinung azüingba teburtem hopta tatemlen nungi class tenzükogo.

FAC nung "Research Paper Publications" workshop ka agi



Dimapur, Rongjui/September 21 (TYO): Research Development Committee, Fazl Ali College, Mokochung-i ayongzuka September 21 nü "Research Paper Publications" onük nung ajemdaker workshop ka agiogo. Mezüngbuba session Asst. Professor, Dept. of Maths Dr Aotemshi I lenisüba nung agi. Pai sentong nung shilem agirtem ajak pelashishia agizük aser sentong indang rasaa ashi. Sentong nung okila o Vice Principal, FAC R. Arenla Aier-i jembu. Lai, shisalen agütsür Dr. Suraiya Tabassum, Associate Professor, Sarojini Naidu Centre for Women's Studies, Jamia Millia Islamia, New Delhi aser Dr Toka Swu, Assistant Professor, Department of Chemistry, Pondicherry University na pelashishia agizük aser academic institutions tem atema research-oriented activities aser publication tem nüngdakba indang lemsatap. Laisa, kanga dang nüngdaka aliba workshop ayongzükba atema college RDC dang kanga

pelaba lemsatapa liasü. Sentong leniri mezüngbuba shisalen agütsür Dr. Suraiya Tabassum metetpelatsüba sülen lai 'Social Science Research: An introduction and insights' onük nung ajemdaker tangazükba agütsü. Lai Social Science research yagi policy recommendations tem lenla ajak nung bushisüngdangtsü aser benoktsüla ta ashi, ajita a s ü n u n g d a n g bushisüngdanertemi parnok indang research subjects kanga junga sayutetsü, ta ashi. Laisa, bushisüngdang ajanga social system nung temelenshi bener arutsü atema tejangraba nung aser telumung sadema lapoka nukjidong tejangja yur bushisüngdangtsüba indang jembu. Dr. Suraiya-i, literature reviews, research tools aser analyses tem len anitsü atema theoretical framework takang ka alitsü nüngdakba indang lemsatap. Lai presentation agütsüba sülen Q & A session nung onük mejangjabtem aika jangjashitsü aser tangazükba tasen agüja

liasü. Iba Q & A session ya Dr. Temjennaro Jamir, Asstt. Professor, Dept. of Education lenisüba nung agi. Maneni tanabuba session Dr. Imliwati Longkumer, Asstt. Professor, Dept. of Chemistry lenisüba nung agi. Shisalen agütsür Dr Toka Swu-i, 'Research Paper Publications - Perspectives in Science' onük nung ajemdaker jembu. Pai, foundational knowledge, methodologies/techniques dak sendakba nung gathered information aser positive attitude akatsü nüngdakba dak rangloker jembu. Pa indang research aser publications dak ajemdaker jembiba mapang pai research zülur benokba mapang tetsükdaktsü balala adokba nung jembotsü atema bushisüngdang ajak nung züluba yimya shidak benoktsüla ta ashi. Dr Toka-i, research articles/reviews nung referencing tayongba akümsü atema aser plagiarism jangjatsü atema Mendeley App aser Turnitin amshitsüba yimya sayu. Iba session atema Q & A sentong Dr. Aolemla Pongener, Asstt. Professor, Dept. of Botany lenisüba nung agia liasü. Kasa mapang nung FAC IQAC Coordinator Dr. Lanurela-i tepela anküp o jembia liasü. Sentong nung FAC Faculty 55 aser tanga college nungia shilem agirtemi sensaksem sentong nung shilem agia liasü.

MAMATETBA OBALA MENUNGRA BILEMTETER

Asür Imnalemba (Chungtia yimsen)
Tasüba anogo: 22.09.2020
 Oba nai onok toktsür küm ka abensaogo saka onoki na kodanga mamateter aser mamatsü. Tanüa onoki na bilemteta sarasadema amonger.
Temeim kinungtsü aser chirnur.



Office of the Akhoya Kosasanger Putu Menden 6 Tatar

(Akhoya Village Council)
 P.O. Changtongya - 798613
TEPELA SANGDONGER
 Asen Aor len anitsü sempet ajiteta ozü sensosanger rongnungi Wb. Arentemjen Jamir, Ao Senden Asst. General Secretary inyaktsü asoshi maoangka tulu agüja ano tanaben shimtetba atema Akhoya Kosasanger Putu menden aser sensosanger ajaki pelaba sangdonger. Tsüngremi pa taküm aser Tir-i anir külem tenzükertem ajak asen lima tejakleni anitsü maneni moajangma.
Sd/- Tiatemjen Chairman

Office of the Kangtsüngtsür Telongjem Tuli

P.O. Tuli. Pin - 798618
 Dist. Mokochung : Nagaland
Pelaba Sangdonger
 Mr. Jongpong Imsong Pastor, East Dimapur Ao Baptist Arogo ajanga Tsüngrem yimli nung pa sentsüwangshi asoshi ano khuret tali tuluba nung bendanga tenzüksü wazüka yutsüba asoshi East Dimapur Ao Baptist Arogo dang pelar aser Jongpong Imsong Pastor ajanga iba konang tetushi sensopur nem bener arutsüba asoshi Kangtsüngtsür Telongjem Tuli ajanga pelaba sangdonger. Tsüngremi Rev. Jongpong Imsong aser par kibong Tsüngremer wadang tuluba inyaktsü asoshi moajangma ta sarasademtsür.
Sd/- Chubanungla President **Sd/- Nungsangkala Gen. Secretary**

KOCC-i Car Sticker campaign tenzükogo



Additional Deputy Commissioner, Kohima, N Bhavani Sri, IAS-i, September 20 nü SKV Petrol Pump, Kohima nung Car Stickers campaign tenzüksüogo. Iba sentong ya Keep Our City Clean, KOCC-i ayongzuka liasü.

Kohima, Rongjui/September 20 (TYO): "Keep Our City Clean, KOCC" mission nung shilem ka ama state yimtiba Kohima nung yimti mereka ayutsü asoshi "Car Stickers" campaign ka tenzükogo. Iba sentong ya September 20 nü SKV Petrol Pump, Kohima nung tenzükba liasü. "Car Stickers" campaign ya Additional Deputy Commissioner, Kohima, N Bhavani Sri, IAS-i tenzüksü, kong KOCC züngsemtema densema liasü. Sentong nung team lenir Khriehuzo Lohe-i anir gari anirtem den yimti mereka ayutsü atema jembiba

sülen garitem nung stickers malokja liasü. Miss Kohima 2018, Vekhotolu Lohe, aser Miss Mega Model Hunt 2021, Nuvezolu Khusoh natia iba sentong nung shilem agiogo. Yimti mereka ayutsü atema tasa tajung asateta sentong tajung ayongzükba atema Bhavani Sri-i sentong ayongertem nem tenüngsang agütsü. Lai ashiba agi, Nagaland ya India nung tebur tajung state tem rongnung ka lir kong süngtonglitong aser aremshiruru aika lir, ta ashi. Laisa, sentong ayongertem dang parnok mission maneni

inyakyonga aotsü ayongzük. Kasa mapang nung Khriehuzo Lohe-i parnok inyakyim indang tatsü agi metetdaksü. "Onoki inyakyim tilaka benoka iba mission tenzük saka yimti aser tzümopung mereka ayutsü atema bendanga inyaker. Anungji onoki onok mapa tilaka ya state yimtiba Kohima nung tenzük," ta pai ashi. Sentong nungsa Bright Morning Star, Kohima nung tanurtemi ken ka aten. Iba sentong ya Kikrunainuo Liezietsu lenisüba nung agi, koba Pele Khezhe, Chotisuh Sazo aser innovative Press-i senotsü teyari agüja inyaka liasü.

Karbi Anglong nung heroin seret 1.5 apu

Diphu, Rongjui/September 21 (Agencies): Assam Kübok Karbi Anglong district nung international shishilembadak sen crore 8 alang heroin seret 1.5 bener lia nisung ana puogo. Hombarnüa kasa tesem nung heroin gm 412 pua liasü, ta police ketdangtsür kati ashi. Nagaland nung arishi küm 27 tain Besii Mao aser pa kinungtsü Kaiha Mao nati iba temesepba mozü Manipur nung Guwahati-i bener oya lia apu, ta ketdangtsüri ashi. Tena ya Dimapur, 4th Mile kübok Naga United Village nung alir. Osang tejangja ka

angazükba sülen police temi Bokajan police station kübok Khatkati tesem meit aoba mapang soapboxe 80 nung iba temesepba mozü bener lia apu, ta Sub-Divisional Police Officer John Das-i osangbenertem dang ashi. Tena ya kinü tanur ka anir oya lia apu, ta paisa ashi. Iba dak sendakba nung Chief Minister Himanta Biswa Sarma-i Assam Police nem tenüngsang agütsüogo. "Tanüp @karbianglongpolice-i Khatkati nung heroin seret ka puogo. Assam police nem tenüngsang agütsür aser maneni mapa tajung inyakang," ta pai tweet asü.



Noksa nung Guinness World Records-i sayaba adianu ana; Umeno Sumiyama (tabelen) aser Koume Kodama na Shodoshima island (tabelen) aser Oita prefecture, Japan kübok nursing home balala nung tangokba anur. Tena ya alima nung tareptem rongnung tantsütila ana lir ta Guinness World Records-i sangdongogo. Tena arishi küm 107 aser anogo 300 (Sept 1 nü tashi nung) tain lir.

Ashleigh Barty WTA Finals atema qualify süogo



Rongjui/September 21, 2021 (Agencies): Defending champion Ash Barty, world number two Aryna Sabalenka aser French Open champion Barbora Krejčíková nungner Mexico nung asayatsü aliba season-ending WTA Finals atema qualify süogo, ta WTA-i Hombarnü metetdaksü.

Final asayatsü atema ano kija asayar pongu tenüng sangdongtsü lir, kong kija asayar tajungtiba ti aser tarep asayar tajungtiba ti tokteptsü. Iba asayamung ya November 8 nü tenzüksü. WTA Finals ya Shenzhen nung asayatsü liasü saka COVID-19 wara pokteter

Malappuram nung Santosh Trophy main round asayatsü

Rongjui/September 21, 2021 (Agencies): Taruba küm 75buba Santosh Trophy Kerala-i ayongzüka Malappuram kübok Payyanad Stadium nung asayatsü. Kerala ya yakta football hub ka akümtsü, ta Kerala Sports Minister, V Abdulrahman-i ashi.

Taoba international & deputy general secretary Abhishek Yadav-i aniba All-India Football Federation team ka den sensak asemba sülen Thiruvananthapuram nung osangbenertem den sensaksemba mapang pai iba osang metetdaksü.

"Covid-19 wara süshia aoba ajanga Kerala nung tenokdangba agütsür aliba tanem tanemi salatsüyonga

aliba ajanga iba ita tetezüklen Guadalajara-i belenerogo.

"2019 küm Billie Jean King Trophy akokba ya kü career nung takok tajungtiba ka liasü," ta world number one Barty-i ashi.

"Alima nung tetsür kija asayar tajungtiba ti rongnung densemba atema aser 2021 WTA Finals atema mezüng qualify asüba atema kanga pelar," ta laisa ashi.

Ajisüaka la iba asayamung asayatsü masayatsü mejangja. La indang coach Craig Tyzzer-i iba ita ashiba agi, iba asayamung nung la shilem agitetsü magitetsü mejangja.

Pai iba asayamung asayatsü aliba high-altitude venue nung asayatsü condition aser asayamung mapang dak sendakba nung tetsükdaksü aliba lemsatepogo aser ashiba agi iba ajanga la February ita asayatsü aliba Australian Open dak kongshitsü akok.

Barty, shiba iba ita US Open tasembuba round nung tsük, la shitemang aser tekelok shisatsü ajak belemadokogo, ta Tyzzer-i Australian Associated Press dang ashi.

Sabalenka aser Krejčíková naprongla iba asayamung tarep asaya nungbo shilem agiatokogo, ajisüaka takümg mezüngbuba kija asaya nung shilem agitsü.

Kasa mapang nung Krejčíková tarep asaya nunga la indang partner Katerina Siniakova den asayatsü qualify süogo aser Japan tsür Shuko Aoyama aser Ena Shibahara nata iba asayamung atema qualify süogo.

2019 küm iba asayamung nung takok angur nem senper USD million 14 agüja liasü.

aoba sülen stadium tema yakta lapoktsü. State nung national aser international asayamung tem tali ayongzüka asayatsü," ta minister-i ashi.

Temetetsükaji wara poktetba ajanga taoba küm national championship zonal asayatem thija liasü.

Kasa mapang nung Abhishek-i ashiba agi, junior aser sub-junior tem atema national camp ayongzüksü asoshi Kerala asadangtsü. "World Cup qualifiers densemba national camp tem Kerala nung ayongzüka agitetsü aser iba ajanga asaya jenjang renloka aoba nung teyari agütsütsü, kechiyong local asayatem aser club team tem camp nung shilem agirtem den asayatsü atema maongka angutsü," ta pai

ashi.

Maneni Jawaharlal Nehru International Stadium, Kochi nung India team den linük pezü nungi bendanger team tem densemba senior women's championship ayongzüka asayatsü. National women's team national camp-a Kerala nung agitsü.

"West Bengal sülen Kerala nung baby league aser senior aser junior league tem ayongzüka asayatsü. Onoki panchayat jenjang nung asayamungtem ayongzüka asayatsü sentong yangludat," ta Abhishek-i ashi.

AIFF ketdangsurtemi ashiba agi, AIFF-i achaayanga coach aser referee tem atema orientation class tem ayongzüka agitsü.



Camp Nou stadium, Barcelona nung Barcelona aser Granada na asayaba mapang Granada nungi asayar Quini-i free kick ka nokdangba noksa nung angur.

Afghanistan nung Taliban-i IPL mesayudaksür

Rongjui/September 21, 2021 (Agencies):

Afghanistan nung Taliban sorkari Indian Premier League (IPL) sayutsü memelar, ta osang balala ajanga metetdaksüogo. Afghanistan nung tongtibang asayar Rashid Khan, Mohammad Nabi aser Mujeeb ur Rahman nungner 2021 IPL nung shilem agidar.

IPL 2021 season ya Islamic state, United Arab Emirates nung Deobarnü nungi tenzüksüogo.

Taoba Afghanistan Cricket Board media manager M Ibrahim Momand-itweet ka ajanga, tetsürtem tsüngsangba aser asaya reprangi aruba tetsürtem tekolak memeibangi aliba amala Islam yimsü dak maketba inyakyimtem

densemba aliba ajanga linük nung IPL sayutsü memelar, ta ashi.

Linük nung tanga osangbenertemia Taliban sorkari IPL sayutsü memelaba indang osang metetdaksüogo.

Taoba hopta Afghanistan sports tekolakbai ashiba agi, Taliban-i asaya 400 asayatsü melatsü saka tetsürtem asayatetsü masayatetsü iba indang osang kecha magütsü. "Yimlibilema tetsürtem dak sendakba tasiüngdangba ojang dang asiüngdang," ta Bashir Ahmad Rustamzai-i news agency AFP dang ashi.

1996 nungi 2001 tashi Afghanistan yimsü asüba mapang Taliban-i tetsürtem asaya nung shilem magidaksü aser tetburtem saisaponga tashiyim agi azüoka liasü.

AFC Cupnung ATK Mohun Bagan FC Nasaf den asayatsü

Rongjui/September 21, 2021 (Agencies): AFC Cup inter-zone semifinal nung Indian Super League (ISL) club ATK Mohun Bagan pur Bodhbarnü Uzbekistan indang FC Nasaf den Markaziy Stadium nung asayatsü.

ATKMB pur tatemsa August ita Maldives nung Group D-South Zone nung asayaogo. Iba asayamung nung parnoki ISL club Bengaluru FC 2-0, Maldives club Maziya Sports & Recreation 3-1 agi akok aser Bangladesh club Bashundhara Kings den goal 1-1 agi draw süa par telok nung temaba jenjang nung tembanga inter-zone semifinal-i ai.

Ajisüaka Uzbek club den asayatsü aliba ya parnok asoshi iba asayamung nung tang tashi nung asaya tasaktiba asütsü. Mohun Bagan pur iba asaya atema Dubai nung hopta ka dang training agi ajisüaka parnok den asayatsü aliba club ya March ita nungi Uzbekistan Professional Football League nung asayaa arudar.

Kasa mapang nung March 13 nü 2020/21 ISL final nung Mumbai City FC den asayaba sülen ATK Mohun Bagan pur tang tashi nung asaya asem nung dang shilem agia lir.

Iba ajanga FC Nasaf striker Andrija Kaluderovic-i iba asaya par teloki akoktsü ta temulung lema bilemer.

Andrija Kaluderovic ya küm ishika tejakdang Mohun Bagan forward Roy Krishna den külemi A-League nung Wellington Phoenix nungi asayaa liasü.

"Onoki ATK Mohun Bagan kokra onok ano kidang khen asayatsü, anungji onok final-i aitsü maongka tulu lir," ta Kaluderovic-i ashi, shiba ISL nung Delhi Dynamos FC nungi 2018/19 season nung asayaogo.

"Onoki asaya akoktsü imlar. Onok hopta shia asayar aser form kanga junga lir. Parnok mapang talangka masayai arudar," ta paisa ashi.

Iba asaya akokba team inter-zone final nung October 20 nü Hongkong club Lee Man den asayatsü. Championship final ya November 5 nü iba asaya akokba team aser West Zone final akokba team na asayatsü.

ATK Mohun Bagan squad: Amrinder Singh, Avilash Paul, Arsh Shaikh, Pritam Kotal, Ashutosh Mehta, Carl McHugh, Subhasish Bose, Sumit Rathi, Joni Kauko, Lenny Rodrigues, Liston Colaco, Prabir Das, Michael Soosairaj, Bidyananda Singh, N Engson Singh, SK Sahil, Ravi Bahadur Rana, Abhishek Dhananjay Suryavanshi, Roy Krishna, David Williams, Manvir Singh aser Kiyan Nassiri.

BILEMDANGANG

"Tenüngsang agütsüba agi nü mulung sünga lidakjang."